



Evelyn Wever-Croes (MEP):

MEP su plan y su programa ta cla pa campaña 2017 y lo tin cambionan riba lista

SANTA CRUZ - Den su discurso durante e celebracion di 45 aniversario di Partido MEP diadomingo cu a pasa, Lider di MEP, Sra. Evelyn Wever-Croes a reflexiona riba e 45 aña di MEP y tambe riba e añanan nos dilanti.

“Gobernacionnan di MEP durante e temporada di Antias y e 4 Gobiernoan di Sr. Nelson Oduber desde cu nos ta Pais Aruba, tabata gobernacionnan na unda cu semper e ser humano tabata e punto central. E bienestar di nos pueblo semper tabata na prome luga.”

Sra. Evelyn Wever-Croes a elabora riba e diferente logronan di partido MEP durante e 45 añanan di diferente gobernacionnan di MEP como tambe e manera drechi cu MEP a goberna nos Pais den tur tempo.

“MEP a construi scolnan, casnan pa vivienda social, cas pa nos grandinan entre otro. Hamas durante gobernacionnan di MEP nos tabatin inseguridad y criminalidad manera cu nos tin awa. MEP hamas a negligencia e cuida y salud di nos Pueblo manera awa ta e caso. Durante un Gobierno di MEP, hamas nos Pais a yega na e borde di bancarota manera e la yega den e Gobierno actual.

Nunca tabata tin asina hopi pleito den reino. Nunca nos Ministernan a brongosa e Pueblo cu un welga di hamber manera tabata e caso di Minister President Mike Eman. Hamas un Gobierno di MEP a haya un KB manera gabinete Mike Eman a haya pa mal gobernacion, mientras cu ni sikiera un Gobernador Mike Eman por a nombra na un manera drechi”, Sra. Wever-Croes a

bisa.

Sra. Evelyn Wever-Croes ta segura e pueblo cu asina cu MEP drenta den gobernacion y trece e cambio cu nos pais tin mester di dje, tur e mal gobernacion di AVP lo pasa pa pasado y bay den historia como e gobernacion mas malo y bergonsoso cu Pais Aruba a conoce.

“Cu mira riba eleccion 2017, partido MEP un biah mas, contrario na partido AVP, lo pone e bienestar di e pueblo na prome luga”.

Falta solamente 11 luna pa eleccion electoral na unda pueblo lo dicidi e rumbo di nos pais. E 11 lunanan aki ta hopi crucial pa nos partido.

“Nos tin trabounan grandi cu nos mester haci. Encuestanan ta mustrand nos cu partido Movimiento Electoral di Pueblo ta creciendo y cu e sosten di e pueblo na e Gobierno di Mike Eman ta bahando. A base di e informacion aki, nos ta bay sigui traha. Naturalmente, nos no ta confia den encuestanan solamente. Nos tin trabounan grandi pa haci. Partido MEP lo drenta den cada skina di Aruba. Nos lo drenta den tur cas cu nos mensahe y plan di solucionnan combina cu cambionan necesario y caranan nobo riba nos lista. Nos lo traha pa convence pueblo di Aruba cu Movimiento Electoral di Pueblo ta e unico solucion”, Sra. Wever-Croes a bisa.

